

于湖居士文集

三

化圖書館

Kaohua Library

開化圖書館

Kaishua library

開化圖書館

Kaishua library

開化圖書館

Kaichwa library

于湖居士文集卷第四

古詩

昨日極暑今日極寒

昨日火流金今日風折膠昨着練布衣今
衣弊緼袍赤帝與玄冥凜凜隔一宵聊將
擁爐適換此揮筆勞冰炭欲盈懷炎涼不
崇朝幻生過隙駒是身九牛毛等是一寒
暑胡爲自談嘲萬法從心生心靜境亦消
悟此本來無締綌同狐貂還當隱吾几試
聽萬竅號

初得愛巖

高巖劃天門，仄徑通乳穴。隈堆青螺髻，帶
嶠白玉闕。外有虎豹蹲，中恐蛟蜃蟄。東榮
俯雷電，西出挾日月。萬壑生悲風，六月不
知熱。但覺駭心目，未易紀筆舌。平生山水
趣，嶺海最竒絕。洞府二十四，未厭屐齒折。
晚乃得游此，餘地皆僕妾。同來六七士，嗜
好頗相躡。舉酒酹山神，慰汝久湮滅。

與邵陽李守二子用東坡韻

兩李有佳句，冰雪洒肺肝。清越石在懸，圓

熟珠走盤我家十二樓下俯千仞湍誰掣
白玉瑣借與二子看臨風度長遂瘴海爲
清寒卻立望九州隘陋非所安便欲馭長
鯤九萬扶搖搏神山在吾牖弱水空瀰漫
回首五千劫不費一指彈絕笑塵中年攝
提與涖灘

奉送李彥國還廬陵

李生來嶺南自挾書一束食簞寄簫寺吃
吃晝夜讀餘子讓頭角文作翻手速小試
不盡能它日真可卜里中老仙伯曾對玉

堂宿高節老彌厲名蓋斗南北掖垣我畏
友不受萬鍾祿卷藏一丘下勲業所迫逐
子歸問道要儲作飢歲穀富貴偶然耳吾
欲子金玉

暑甚得雨與張文伯同登禪智寺

老火陵穉金聚作三日熱舟行湘江上蒸
煮到魚鼈黑雲起東北一震山石裂不知
雨來處但見風卷葉銀河倚天瀉高浪舞
飛雪只聽打蓬聲已覺涼意愜岸傍古佛
屋樓殿頗帶嶮不辭衝泥去一看雨脚闊

吾宗紫巖客窮苦志不懾自我來浯溪奔
走已旬浹我懶久廢學愧子來挈挈相携
得偉觀爲子熾然說願子領話頭吾今指
標月

丙戌七夕入衡陽境獨游岸傍小
寺

七年暑中行道路萬里賒今夕已七夕我
猶在天涯繫舡蒼石根人影散晚沙上岸
是脩竹仄徑如行蛇茅屋四五間往昔佛
所家經禪劫火盡舊觀初萌芽墻疊古瓦

益僧披破袈裟喜聞拄杖聲掃地自點茶
何以為我娛冰雪汲井花一洗十日渴分
涼到童髻盈盈牛女期不着雨洗車踈星
銀漢動新月玉鈎斜更呼老奚官卷蘆作
鳴笳莫驚潭中龍聊起棲樹鷄

福嚴丙戌七月

行行山益高所見益以奇煮茶商臺寺更
上千級梯道傍古時松閱世心已灰不與
歲月競况受霜雪威路回聞鐘聲寶刹隱
翠微排空寫金碧剎石著拱柝門前堯率

橋劫火昔所遺神龍厭庠陋一炬然枯其
譚笑舊觀還殿柱百尺圍老禪七十餘高
與此山齊大屋貯龍象空巖走金犀齋盂
細細參至味無鹽醯頗聞三生藏中有萬
寶齋佛牙舍利湧貝葉旁行稀剖蚌慈相
尊破匣血縷飛稽首所願觀爲洗往昔非
卻尋上山路擬看浴日池急雨忽留人吾
其少須之

湖湘以竹車激水杭稻如雲書此
能仁院壁

象龍喚不應竹龍起行雨聯綿十車輻伊
輒百舟擗轉此大法輪救汝旱歲苦橫江
鎖巨石濺瀑疊城鼓神機日夜運甘澤高
下普老農用不知瞬息了千畝抱孫帶黃
犢但看翠浪舞餘波及井曰春玉飲醪乳
江吳誇七蹋足蠶腰背僕此樂殊未知吾
歸當教汝

贈黃司法

吾友黃升鄉乃是天下士阿翁苦硬節御
坐留諫紙辛勤教其子不但爲科第一官

法曹掾整敷老胥忌吾行桂嶺南所得但
吾子願渠自愛惜窮達初不計功名儻來
耳期子以千歲

宵征

畏暑倦長道呼童戒宵征三更渡前溪溪
水清且鳴舟人自相喚炬火如踈星俯視
亂石多仰見北斗橫微微白露下磔磔宿
鳥驚竹輿出林薄十里月漸明光采散草
木涼意侵冠纓

汎湘江

十日行湘江湘水清而温不療亭午渴却
憶土井渾道傍古刹竿着屋高樹根飛泉
出山腹甘冷冰瓶盆何止解百憂一洒塵
埃昏設供者誰與稽首兩足尊

上封寺

七月十五夜我在祝融峯與世隔幾塵上
天通九重手取白玉盤納之朱陵宮羣山
羅豆登萬籟酣笙鏞盡酌五湖水勸我酒
一鐘爲君賦長言寫向西北風

一作爲君長言
謠寫向東南風

岸傍偶得木犀

天公不求金富媪不復藏居然土同價散
作草木芳英英園中葵一心傾太陽采采
籬下菊令汝壽命康惟此木之犀更貯萬
斛香雄姿傲霜雪鱗甲森青蒼三賢鼎足
立正色凜相望豈比桃李徒紅紫紛紛披
聊息貪者心來上君子堂歲晚從我遊
汝兄弟行

王弱翁與余相遇漢口賦古意贈

別

我舡行荆江厭此江水渾北風知人意引

着清漢濱漢濱有佳人心與漢水白涉江
弄秋葉喚客踏明月明月永相望佳人不
可忘期君以千年珮我明珠璫

贈朱遠遊

遠遊何方來
峩峩古衣冠
袖中三百篇
貯月白玉盤
溪清石瀨急
雪凍銅壺乾
有如山澤仙
外瘠中氣宇
便合朱絃彈
細着青瑤刊
懷哉人未識
飛步江風寒

和張欽夫尋梅

寒梅本無心
適與春風期
孤根擢歲晚
桃李

李更媚之取我碧玉壺薦此白雪枝故人
不可寄耿耿空自竒故人隔湘江獨立知
者稀采香正滋蘭忍飢不食薇拏舟許過
我此約不可違江南煙雨村願與子俱歸

黃龍侍者本高覓詩

高禪本儒冠誰令著伽黎勞渠千里來贈
我一卷詩句法有源流人物乃清苦不用
追九僧政須越諸祖君家寒巖師今代僧
中龍持此送君行更去問乃翁

題濁醪賦後

仇君在長沙未嘗出門養丹火三十年不惜分人屢起死又善釀山東酒李卿寶文所爲賦濁醪也此軸留余所半載其猶子洪自長沙來荊州求跋乃書一詩併歸之幸呈似南軒先生或肯同作

仇公昔釣璜乃得丹竈術閉門養丹火墮甕釀新林酒熟分四鄰丹成活千人窮巷不改樂一室長如春我知酒中仙歲晚當得度乘雲見東皇請誦濁醪賦

屢登橫舟欲賦不成阻風漢口廼
追作寄趙富文揚齊伯

已過漢陽岸却望橫舟山秀色挹不盡西
風將夢還我昔登橫舟最愛漢陽樹橫舟
今不見樹色只如故公舟在青冥我舟一
浮萍闌干試拍手我亦同舉酒

棲真寄南康錢守

憶昔姑蘇臺實與君子別一別已六年音
書間何闊我行半天下塵土汙須髮君亦
抱艱棘衣袂洒清血今日復何日相望一

山隔我領通玄府乃在廬山北君宦山之
南兵衛森畫戟無由接杯酒但可共明月
作詩付郵筒聊復寄消息

黃子餘自海昏見予於九江欲行
爲賦此詩

昔我初識君乃在潯陽城卻數已十年此
地還見君積雨楚水高落日淮山明我病
不舉酒何以娛佳賓我行不可留明復與
君別悠悠千里情還當付明月

勸范東叔飲

今代太史公四海范氏門斯文十世澤斑
斑被諸孫我識叔西父白玉比粹溫今來
見令弟俊氣百馬奔一第溷子耳勿愧而
家尊臨分無多言更酌老瓦盆

留題彭澤故縣修真觀

五月問脩途今日一百里莫投彭澤縣愧
此邑中士古觀官道傍借榻暫少憇折腰
向道士乞我五斗米聊爲奴僕飯明日更

早起

一本作借榻容少休高
林度清風似爲客子謀

湘中館

雲去月在沙潦淨秋滿川北斗掛落木西
風送歸船去年過湘中夜半投馬鞭篝燈
洗塵土所見只屋椽雞鳴問前途殘夢兀
擔肩那知闌干外有此山水妍微微清露
溥稍稍明河偏孤光耿自照靜極忻所便
身世兩悠然吾其遂飛仙

中隱

吾家中隱君才比萬斛泉短小精悍姿一
劍當雄邊去年郴州賊俯視衡嶽顛君從
襄陽來孤忠作文鋌譚笑百雉安淨洗湖

嶺煙謂當疇王勲金印如斗懸言歸遽如
許此意誰爲宣小隱即居山大隱即居廛
夫君處其中政爾當留連早晚有詔書喚
君遠朝天欲爲中隱遊更着三十年

贈師永錫併簡子西文潛

永錫西方來持論乃據正徒飯不飲酒自
詭作縣令我已識淮父但未見伯渾林林
三珠樹知是難弟昆上方顧中原有君但
無臣豈有千里足而令走跋跋願子徑入
關請對通明殿此事定在我不必問和戰

于湖居士文集卷第四

開化圖書館
Wakhu Library

于湖居士文集卷第五

古詩

萍鄉境上有驛傍有老杉餘百本
余過而愛之驛無名余名之曰愛
直而爲之詩又以告邑大夫趙君
公廩曰使繼自今爲令者幸如君
之賢也則此杉長存不然將斧斤
斯民以自封植於杉何有

此杉已百年林立官道側鬼神所訶護斤
斧不敢迫愛此遺直姿凜凜有正色未云

支大厦聊以蔭行客作詩調令尹爲我驛
壁刻但使杉長存懸知令清白

遊千山觀

朝遊七星巖莫上千山觀東西兩竒絕勢
略領海半長江寫練素疊嶂俯杯桮中有
萬雉城鐵立不可玩伏龍起行雨老樹舞
影亂衝風挾驚雷意恐崖谷斷路懸石磴
滑衆客紛駭汗嵌空偶自託發若鳥集灌
須臾便開霽杲日麗清漢卻坐山巔亭容
我烏憤岸長懷付尊酒別語不容判會須

九垓外與子期汗漫

庚辰二月夜雪

夜半雨鳴廊晨起雪暗空不減臘月寒故
作昨日風融銀擁山腰飛花滿裘茸辦此
了不難咳唾煩天工纖纖園中花一夕無
光容凜凜庭下松巍然兩蒼龍

張欽夫笋脯甚佳秘其方不以示

人戲遣此詩

使君喜食笋笋脯味勝肉秘法不肯傳閑
門課私僕君不見金谷饌客本萍蓬豪世

藉此真成癡但令長須日致饋不敢求君
帳下兒

蒙和荅益竒輒復爲謝

齋厨極蕭條晚食以當肉公來共蔬盤留
語輒更僕平生懲沸仍吹藿欲了官事渠
能癡何時竟作淮南歸擊鮮校獵從廬兒
張欽夫送笋脯與方俱來復作

笋脯登吾盤可使食無肉鮭腥辟三舍棕
栴乃臣僕書生長有十甕虀却笑虎頭骨
相癡得君新法也大竒且復從游錦綉兒

勸農以湘波不動楚山碧花壓闌
干春晝長爲韻得干字

積雨已連月長沙尚春寒今朝定何朝喚
客來江干問訊湘西寺霧重江漫漫聊須
萬斛舟渡此千尺湍老松如相迎翠落頭
上冠却望城中花寶髻垂珠鬢勸農辰有故
事般樂非所安薄晚會春園老稚隨馬鞍
彘肩侑尊酒呼喚來同盤從容及鄙事爾
汝開心肝我是耕田夫偶然此爲官飽不
知稼穡愧汝催租瘢願言各努力長年好

相看

陳仲思以太夫人高年奉祠便養
卜居城東茅屋數間澹如也移花
種竹山林丘壑之勝湘州所無食
不足而樂有餘謂古之隱君子若
仲思者非耶乾道戊子六月某同
張欽夫過焉裴回彌日旣莫而忘
去欽夫欲專壑買鄰欽夫有詩某

次韻

平生交游中此士故耐久不折爲米腰頗

袖斲輪手卜居並東郭草草宮一畝日課
種樹書箋題徧窻牖花草當姬妾松竹是
朋友上堂娛偏親家飯隨野藜客至即舉
詩興來亦沽酒清溪遶屋角高木老未朽
翻翻荷見背戢戢魚駢首幽觀天所藏勝
踐我獨後不因南軒君茲遊幾時有爲君
便買鄰溪南好岡阜我喜君亦狂呼兒挈
尊卣一洒塵埃曾快若苗去莠夜涼佳月
出人影散箕斗恨我當先歸君能小留否

贈陳監廟

陳子居城東茆屋三四間下有五畝園灌
畦泐清灣松栢充羽葆荷芰作髻鬟再拜
太夫人壽比衡麓慳我早與子遊期子到
孔顏察子意甚真不與時輩斑扁舟漾荆
渚餘子頗誇訕大道甚坦夷勿歎行路難
彼自種荆棘吾寧翦榛菅一醉乘秋風共
此霜月彎

送邵懷英分魯直詩韻人間風日
不到處天上玉堂森寶書得書字
將酒澆君車問君行何如初無十萬錢但

有一束書往昔千官班渠曾綴簪裾日月
九門隔江湖十年餘老幹久凌剝寒灰費
吹噓今者尺一追問津承明廬蓬萊道家
山紫極帝所居功名儻來爾步武當徐徐
遙岑出踈林淺水行游魚臨分再三囑音
信莫我踈

送張定叟

戊子歲二月定叟如南山行李太匆草問
君何當還敬展南陽阡永慕涕已潛畢事
却登攬紆子悲悴顏羣峯最高處眼界窮

塵寰紫蓋款佛刹黃庭扣玄關夜榻藉雲
衲曉窻闖煙鬟野飯薦筍蕨幽尋翦榛菅
酒賤可痛飲詩成要重刪勿作賈胡留閩
人賦刀環歸時買竹鬮小破行囊慳

朱陵洞

黑雲起我趾白雨過山脚卻立朱陵洞一
望紫虛閣神丹吾已必仙臂真可握試向
靜處聽空濛有笙鶴

題屏風送裘甫歸臨川

不見已四年既見還作別贈以墨竹屏况

此君子節歲月不我留玉立空山陰願言
無相忘因風時寄音

送道州酒與吳伯承

陽城所臨州酒味猶清醇我病不能飲負
此盎盎春髯吳燒苦筍喚客車連軫名酒
隨惡詩掀髯一笑鞵

葵軒觀筍

葵軒新筍生戢戢水蒼玉脫籜便林立爾
輩殊窘束黃梅四月雨念子亦良苦十二
鳳凰鳴秋風何處聲

贈尹童子夢龍

長沙尹氏子四歲誦萬言青松一寸長歲
晚當摩天終爲棟梁用莫作桷與椽斫根
剗其明本瘁末亦顛持此勸乃翁閉門養
真源

一覽亭

城中十萬戶亭脚五千丈小退鴈鷺行却
立雲雨上主人心如此坐了鏡中像沙尾
是我舡煙波更空曠

睡起

睡起有佳聲蕭蕭竹間雨
蒿廬澹無營一榻不受暑
微颺入牖來喚起香中縷
撫卷忽超然空梁走飢鼠

吳伯承送苦筍消梅用來韻各賦

一篇

問訊湘西筍政得夜來雨
高標諸枉直餘味良藥苦

又

脆圓供小摘不待四月雨
新詩同咀嚼學子心獨苦

戲書贈蘇待問

從公覓此紙欲與蘇待問
醉中墨鷗黑北風起雲陣
明朝酒醒看爲子傳心印
子若不領略取火燒作燼

贈震山主

震公住山年與我共壬子
瓦礫化金碧願力一彈指
鄉來祖師禪風定月蒲天
語子義第一飢餐困當眠

春盡日送聞人伯卿次家君韻

早年翰墨場未見心已親
筆底三峽流曾

次萬卷春省試文字在某房相從未淹時欲別故

惱人敢賡老仙詩索去不用頻

洗塵贈張立之判官

立之居糟丘曾有萬斛塵歸來卧西窗涇渭自此分汙泥生芙蓉渠溱墟有白雲莫厭吏事煩願子清天君

王龜齡賦喜雨諸賢畢和某客行半月未嘗晴也故於末章云

久旱一雨足高低水平分老農爾何知史君甚艱勤史君家鴈山出作無心雲四海

方立槁須君來救焚

又

客行苦淫潦道路渺不分十步九掀淖眷
言僕夫勤昔旱欲訟風今雨當誅雲我已
寫綠章擬向清夜焚

八桂堂池上賞蓮納涼

山月半池白水風終夜涼蛙聲作鼓吹芟
製爲衣裳萬里俱遠客三人同一觴但使
嶺海豐此樂未渠央

前日出城苗猶立槁今日過興安

境上田水灌輸鬱然彌望有秋可
必乃知賢者之政神速如此輒寄
呈交代仲欽秘閣

筒車無停輪木規着高格杭稔接新潤草
木丐餘澤府公爲霖手號令行頃刻願持
一勺水敬往壽南伯

南臺

我遊衡嶽巔路半此歇脚風雷駕飛殿日
月隱傑閣闌干十萬里仰視天一握遂訪
紫虛君歸時騎白鶴

書懷

七夕在衡陽九日在蘄州秋風浩如海我行尚扁舟破帽不堪落菊花空滿頭醉眼忽瞠若悠然過滄洲

元宵同張欽夫邵懷英分韻得紅旗字

佳月姪纖雲微和扇東風聊持一杯淥共此千燈紅吾宗延閣英聖學與天通且最治郡課遂收活國功

又

邵子坐學官今日有詔追道山萃竹帛武
庫森戈旗文武要兩有腐儒不足為明年
燕端門舉酒還相思

贈盧司法

逃秦盧博士讀書不讀律江陵法曹椽移
病滿百日燕坐供佛香青燈照繩床肺熱
今無恙今一姪門前春草長

于湖居士文集卷第五

九

于湖集五

文

開化圖書館
Kaihua Library

于湖居士文集卷第六

律詩

進芝草

廟錫珍符豈偶然
靈華再見只經年
祥開二室昭貽燕
根託同楹自屬聯
上瑞應誠雖紹至
宸衷思孝益增虔
微臣願考皇天意
不獻終童效異篇

又

煌煌瑞彩映金鋪
元氣回旋即此都
太史連年書盛事
近臣更日奏新圖
璇宮薦祉

寧虛應玉葉流芳已兆符早晚清塵款原
廟臨觀敢請駐前驅

某頃蒙信陽使君教以邊字韻佳
句伏讀降歎病勸荅謝甚緩復不
能竒仰俟斷削

風流追數建安年誰遣朱幡並塞邊舉國
向來儒服少是邦端有大夫賢須公帷幄
收長策着我江湖刺釣舡池閣追涼肯臨
否紅粧翠蓋擁三千

又

百適歸來又一年
投身烽火戍樓邊
私憂自笑愚無策
制勝懸知國有賢
北去燕然堪勒石
西來樊口看燒舡
中州更有王夫子
筆陣猶能獨掃千

子雲壓境先遣詩次韻

相風日日問長年
鷓首遙知近箇邊
別後情親難過我
故家人物更誰賢
一尊且對荒城酒
六月休牽上水舡
小此淹留待追詔
公車歸奏牘三千

送劉伯同侍開府公入覲

相公早勒太常銘康樂當家更典刑槍急
曾看飛鳥過筆精時作換鵝經極知許國
心常赤趁取封侯鬢尚青若到都城見知
舊爲言江漢有浮萍

謝元封
康樂公

送子雲倅荊州

閱世波流險未涯愛君悃幅靜無華高門
自惜聯三戟飛珮何當乞九霞喬木世臣
餘故國采蘋齊女甚宜家君王早晚思前
席會有徵書訪賈嘉

又

荆吳相望各天涯，惜別尊前菊未華。
便放扁舟衝駭浪，要看秋日冠輕霞。
新詩滿路分吾子，盛業康時是故家。
好去依劉靜暖，瑣策勲行即賜褒嘉。

枕上聞雪呈趙郭二丈

上瑞來寧玉座憂，夜聲先到竹窗幽。
飢腸已作來年飽，病眼聊須臆月收。
高士清貧無弊履，故人狂與阻扁舟。
却思清曠江濱遠，路鷓兔成車酒自筍。

湖上晚歸遇雨

陰雲靄靄草萋萋晚過東湖雨濕衣細柳
含煙凝翠色浮鷗戲水弄晴暉輕舟繫纜
斜依岸釣子收輪欲下磯湖上人家未扃
戶兒童蓑笠負薪歸

雨入廬山

夢想羗廬一段竒經行那得雨追一本隨

晴來見說山逾好勝處如今我自知虛室

真人珠咳唾屯庵老子白鬚眉並游三士

風流甚袖手傍觀定有詩清虛真人皇甫
坦東林長老道

顏俱在山中

再和

借

一作帶本

兩尋山故自竒幕中佳客肯相隨

清游端拜史君賜此樂詎容兒輩知暗谷
水來鳴雜佩遠峯煙斷出脩眉庾樓百尺
江千里遙憶憑高政索詩

郡侯遣騎至山中餽名醞輒呈長

句用黃宰韻

山南山北雨生寒竹樹風煙蒼莽間青壁
倚天元未見白衣送酒故相關共追蓮社
公應許穩上籃輿我欲還後日重來拚一

月細扶藜杖覓孱顏

去年正月三日雪霽入昭亭訪應

庵如庵二老今年在臨川追懷昔

游用寄屯庵韻

蹇驢衝

一作一本

雪度松林齧

一作一本

石溪流有

令音旋摘白雲濡燥吻更參黃蘗印初心

嵐開複嶺雲千疊凍合浮圖玉數尋一夢

經年歸去好宦情全薄此情深

屯庵自東林欲還蜀某以報恩招

之大人賦詩勸請再次韻

憶携拄杖過東林掣電犇雷聽法音青壁
倚天元滿眼白雲出岫本無心我眉江嶮
公無度法眼泉清我欲尋手種庭前栢樹
子孤根應比鄉來深

用韻簡天童應庵

敬亭松竹古叢林二老風流舊賞音樓閣
長開太平象鐘魚能洗祖師心別來黃鵠
還千里盟在白鷗當再尋却憶西堂大言
客只今高坐海雲深

奉陪宣守任史君謁昭亭神祠

緩驅千騎出朝京名門喚得春回眼界青
脚靈風來廟步馬蹄山雪過昭亭極知太
守懷忠款端為君王薦德馨慚愧去年冬
十月軍書徹夜聽鳴鈴

又

豐年已卜稻如京雪盡春從草際青
竹裏紅旗行點點松間白塔見亭亭
暖回宿麥開寒色風約踈梅度晚馨
却憶宣城李太白也將詩句掣齋鈴

太白詩云昨日方為宣城客掣鈴交通二

十日

任守作醮爲民祈福先期而雪是
日開霽

紫府仙人自列真綠章封事更通神清塵
已作連宵雪不夜潛回萬屋春玉節朱幡
來浩蕩雲車風馬正紛綸步虛聲徹朝元
路便挈荷囊款帝闈

應庵退席蔣山來寄昭亭萬壽寺三
請不得已而去輒贈長句兼簡蘇
州內翰尚書

逍遙丘壑欲忘年忽作風蟬蛻骨仙鍾阜

恰從三昧起靈

一本作雲

巖重要一燈傳極知

掃迹終無策且與臨岐快着鞭莫作山林
城市想從來大隱故居廛

又

不寄音書又隔年因師問訊玉堂仙碧油
早覺儒爲貴青海應無箭可傳憶昔絲綸
催喚仗何時沙路聽鳴鞭生涯落寞公知
否準擬松江受一廛

辛巳冬聞德音

帳殿稱觴送喜頻德音借與萬方春指揮

夷夏無遺策開闔乾坤有至神
南斗夜纏龍虎氣北風朝蕩犬羊塵
明年玉燭王正月擬上梁園奉貢珍

又

韃靼奚家款附多王師直到白溝河
守江諸將遙分閫絕漠殘胡競倒戈
翠蹕春行天動色牙樯宵濟海無波
小儒不得參戎事贖賦新詩續雅歌

和曾裘父韻送老人赴鎮九江

邊箭收聲江不波廬山高處與天摩
向來

只作青鞋計此去無如紫詔何塵滿庾樓
煩翦拂經餘蓮社更摩挲文成本自籌帷
幄不數黥彭戰伐多

上丁齋宿

青衿陪祀憶初年老矣齋居重慨然俎豆
不知鵝鶴事牲牢空薦犬羊羶北來被髮
車連野東去乘槎浪接天汲汲兩宮常旰
食受膳歸去淚如川

和摠得居士康樂亭韻

尚憶池塘夢阿連當時此意惜無傳薪車

不障洪河決喬木終隨故國顛柳下煨工
真得道竹林酒友謾稱賢先生義槩雲天
薄千載參渠活句禪

寄張真父舍人

玉珮瓊琚出近班仙槎從此到人間聊須
海內無雙士往鎮坤維百二關御府應留
霜簡看鄉人休羨錦衣還嗚呼國步艱危
日補衮懸知欠仲山

又

投分平生不數人憶陪文館笑談新資中

宰樹看成拱荆府詩筒迹又陳已恨別離
空歲月那知解后亦參辰古來命駕須千
里薄宦區區愧此身

中秋觀月齊雲樓用孫昌符韻

玉宇無塵夜氣清銀河徹底素波明人應
好月同千里身在高樓近一本作接五城丹桂
定知憐我老綠尊何惜為君傾建章鳩鵲
當年夢便欲憑空上玉京

題魯如晦通隱

先生早結社中蓮覆錦憑熊亦偶然不向

先生早結社中運履錦憑熊亦偶然不向
江湖忘魏闕故應山澤有儒仙十洲便著
登瀛士三徑難留避世賢我亦經營一丘
壑問公先乞小壺天

同胡邦衡夜直

幕用高名二十年敢期丹地接周旋先生
義與雲天薄老去心如鐵石堅夢了瓊崖
身益壯煙銷金塢臭空傳一尊莫惜空相
屬宮漏穿花夜色鮮一作月
滿天

雪晴成五十六字

鳥烏聲樂作初晴日到南窗氣象新天接

瓊瑤三萬頃樹明組練五千人已從炎海
消陰鑿更與神臯洗戰塵曾侍嚴宸知帝
力隆興借與萬方春

將如會稽寄曾吉甫

起居一代文章老闕寄音書恰二年詩債
未還緣懶拙官游如此竟危顛會稽舊有
探書穴賀監應尋載酒舡我欲從公留十
日問公乞句手親編

過昭亭哭二弟墓

陌上春風久矣歸墓頭衰草正迷離白頭

未拔三年淚黃壤長埋短世悲憶昔追游
常並轡只今獨往更題詩兩兒二弟俱冥
漠顧影伶俜欲語誰

贈邕州滕史君

千騎東方白玉鑣十眉環坐紫檀槽安南
都護來鰲禁建武將軍握豹韜瘴雨蠻煙
驚鼓角朔雲邊雪蒲旌旄夕烽不到甘泉
殿尺一徵還近赭袍

開

于湖居士文集卷第六

開化圖書館

Wathwa Library

于湖居士文集卷第七

律詩

齊山

江山平遠三千里水石嵌空二百巖地闢
天開成洞府峯回路轉有精籃九華卻立
纔堪倚萬井橫陳我所監欲賦齊山無傑
句夢中危壁尚巉巉

一本作提
筆上巉巉

夜讀五公楚東酬唱輒書其後呈

龜齡

同是清都紫府仙帝教彈壓楚山川星躔

錯落珠連緯嶽鎮岩堯柱倚天宮羽在縣
金奏合驂駟參隊寶花鮮平生我亦詩成
癖却悔來遲不與編

薦福觀何卿麟壁間詩對之悵然

次前韻

金華老子定臞仙翰墨文章徧兩川遺迹
已驚風落木高名依舊日行天人間易得
朱顏老寺壁空懸玉唾鮮欲繼三賢歌薤
露嚴詩杜集儻同編

再用韻作五公詩

公如韓子定飛仙更喜門人老玉川莫說
詩筒頻度嶺即看侯弁去朝天飛龍位正
雲霄近集鳳樓高采色鮮我欲扁舟君記
否但教歸去雜民編

蒙侍御丈再用韻作送行詩走筆
和荅迫放舡不暇工也

憶曾總領道山仙自挽狂瀾制百川廷策
萬言功蓋世臺評三上力回天楚東騰喜
詩郵速天北催頒詔墨鮮老我江湖堪野
史看公勲業手親編

龜齡携具同景盧嘉叟餞別於薦
福即席再用韻賦四客詩

使君領客訪金仙小隊旌旗錦一川我欲
采芝非辟世公當立極要擎天詩聲政爾
容傳藁僧律何嘗禁割鮮一笑番陽逢歲
熟問公鐘磬幾時編

登清音堂其下琵琶洲也再用韻
夜橫霜竹夢遊仙曉到餘干月蒲川山遶
樓臺欲無地水環洲渚更連天明霞正抹
朱絃直芳草分垂綠綬綬鮮却憶洞庭張樂

地石鐘浮磬定同編

餘干趙公頤賢宗室也魏公題其
堂曰養正且爲作銘取易頤之義
刻碑堂上予過之爲賦詩

眼裏紛紛不要同從教三徑蒲蒿蓬肯來
與子談周易此去何人識魏公家近星辰
雙闕北身居煙浪五湖東清臺有日占雲
氣一丈豐碑夜貫虹

雞籠福地在歷陽將至豐城望一
山宛然感之賦詩

黃茅白葦徑才通忽見晴嵐掃翠空從吏
只令俱蝨戶仙山何許是雞籠逢人漸覺
交游少問路仍行盜賊中自是麈才合麈
使瘴鄉那得便途窮

午憩道傍人家

一崦人家竹樹涼午陰深處著胡床石泉
政似煮茗沸稻花已作炊秔香夢到家園
歸自好起尋官路去何長塵埃滿面迎西
日底處青山是故鄉

入清江界地名九段田沃壤百里

黃雲際天他處未有也

野水瀰漫欲漲川
稻雲烘日更連天
定無適粵千金橐
可買臨江九段田
黃犢眠邊高樹蔭
白雞啼處遠炊煙
此中若許投簪紱
便老耒耜卜數椽

題吳城廟

乞得東歸一信風
敬持牲酒扣靈宮
千尋

石甃蒼藤合百歲
神倉赤甍空

廟有神倉每遇覆舟

則赤起 浥浥午陰移
岸樹蕭蕭涼意滿
舡蓬

杖藜更作僧坊去
借壁題詩却未工

呈樞密劉恭父

鼎席方虛望已隆上游那得更煩公敢言
兩鎮成交契自是孤根累化工舊粥新開
元帥府閑官且領太平宮歸家淨洗如椽
筆準擬燕然勒駿功

子功補之遠送海錯甚珍

白羃烏羊見未曾青蛇赤蟻當常珍忽驚
海物來登坐能致南烹有故人萬里漂流
憐逐食百年麤糲愧嘗新新筍恰趁來時
熟細酌梅花雪片春

張仲欽朝陽亭亭在建康

便合朝陽作鳳鳴江亭聊此駐脩程南瞻
御路臨雙闕東望仙家接五城日上白門
兵氣靜春歸淮浦暗潮平遙憐莫府文書
省時下滄浪自濯纓

次韻

明年余爲桂州仲欽以常參官十六
人薦爲廣西提點刑獄公事又明年
余罷去仲欽直秘閣寔代余蓋仲欽
常遊朝陽巖而樂之於余之行也仲

欽置酒巖上諸侯賓客咸集顧不可
以無語乃賡建康之詩以記余與仲
欽事契如此爲嶺表異日雄觀云

空巖相望一牛鳴不要郵籤報水程天接
海光通外徼地連江勢挾重城絲綸疊至
龍恩重繡斧前驅蜚霧平鳳閣鸞臺有虛
位請君從此振朝纓

又

飢腸得酒作雷鳴痛飲狂歌不自程坐上
波瀾生健筆歸來鐘鼓動巖城不應此地

淹鴻業盍與吾君致太平
伏櫪壯心猶未已
須君爲我請長纓

送張司戶還蜀

似向川人有夙緣
交游存歿最多賢
今年初識張公子
六月還尋上水舡
萬里親庭心已到
一杯別酒意空傳
西行賸有新詩句
寄我應書十樣牋

和仲彌性煙霏佳句兼簡貳車

收斂經綸寄一麾
戲分風月與煙霏
醉餘綵筆三千首
老去蒼官四十圍
露菊溥秋

催落帽蠟花摧夜照更衣登臨縱好難留
滯白髮雙親待汝歸

又

引手星辰逼太微
濫霄雲物散空霏
莫山好處青成案
秋月明時雪打圍
竹洗佳人千點淚
荷翻仙子六銖衣
西巖定有漁翁宿
障雨攔風不肯歸

庾樓和林黃中韻

九月扁舟下水風
一尊佳處與君同
眼高四海氛塵外
詩在千山紫翠中
傾坐只驚

談塵白踏筵不怕舞衫紅樓頭今古無窮
事醉倚胡牀月蒲空

高遠亭和林黃中韻

簷桷飛翔入太空下窺廬嶽最高峯
亭如峴首應遺愛詩比西湖欲亢宗
天上喚君從此近酒邊着我幾時重
憑闌欲去仍回首誰與佳名自點膏

與同僚十五人謝晴東明得淵字
靈光便滿恒沙界大士重來七十年
秋入郊原成樂歲風隨簫鼓散香煙
定知蠻獠

安三窟更遣蛟龍闕九淵太守憂民但逃
責所忻畢至有群賢

釋奠

又領諸儒款泮宮車書同處禮應同栢庭
老影留江月竹屋寒聲作社風坐客語殘
香一穗候人催起鼓三通歸來稅冕仍分
肉更覺休官興未窮

風雨石首呈同行寄荊州僚舊

昨日離筵酒未醒今朝風雨暗江亭近人
積水春全綠隔岸荒山夜却青野吏衣冠

行木偶客舡燈火散踈星寬程且作三旬
約要看廬山紫翠屏

江行再用前韻

澤畔行吟我獨醒歸程不計短長亭西風
送浪頭頭白芳草隨人段段青昨夜踈蓬
猶窘雨今朝嚴鼓欲侵星無人去喚華容
宰畫我江行作小屏

次韻黃子餘

縮肩得句極酸寒何似黃郎咳唾間少日
曾經諸老學傳家自有祖師關詞林根柢

今誰在振古風流要力還我老故應無用
此因君猶欲更晞顏

去臨川書西津漁家

作客臨川又一年却尋歸路淺灘舡宦游
到處真聊爾別恨何須更黯然夾道長紅
慚父老繞城濃碧記山川無端此地成留
滯定自從渠有宿緣

將至池陽呈魯使君

珍重池陽魯使君忘年交契獨情親江山
佳處公開府風雨來時我問津翠逼筍輿

松徑合綠隨秧馬稻畦新東歸賸作登臨
好病怯詩腸故惱人

上元設醮畢作長句

綠簡朱書自叩真復爐香霧晚細緝雪花
便作茶花白春色還隨月色新江漲不憂
堤萬丈年豐何啻粟千困微生只擬休官
去拜胙歸來吉夢頻

齊安郡夫人挽章

錢長主之孫女
揚子寬之內子

儲祥吳越王家子媿德蓬萊閣上仙湯沐
幾年開大國笄珈長夜拚窮泉鸞臺曉月

悲塵鏡鳳軫春風泣斷絃木落菱枯何限
恨藁砧應賦悼亡篇

于湖居士文集卷第七

于湖居士文集卷第八

律詩

賀郊祀 并序

臣恭惟 皇帝陛下飭躬齋精祇見
郊廟神靈昭答符瑞紛委臣猥叨奉
引與覲熙事竊慕天保歸美之義昧
死再拜上郊祀慶成詩一章句格淺
鄙不足以鋪張鉅麗垂示無極臣不
勝恐懼惟 陛下幸赦

漢統千齡接虞衡七政齊德馨天自饗容

侵古猶稽輿衛鈞陳北衣冠觀闕西景靈宮在

國之雨先清道蹕寒避禮神圭給事中周麟之實進

圭為臣言圭之温手不為知寒蓋和氣所聚方士朝仙仗是日有異人迎

駕于宮垣挾御堤廟芝楹疊壁去歲靈芝又生廟楹

帝樂字連奎始用御歌虛次尤祗慄不御懷

親極慘悽自微宗室還復珠旒依玉色帝淚霑不已

蘭炬映璇題兩相初扶翼崇壇六降隣粵初

卜郊及今六舉上儀於是方備二相高靈森欲墮諸福應如

携燎夜壇三燭凌霜甲萬犀宗藩申寶酌

祕檢護金泥奉引星辰爛旋歸錦繡迷端

門臨五鳳步輦駐雙霓日照雲裳委風含
綵笈低和聲翔四表嘉澤浸羣黎盛事真
寥廓微生荷獎提侍祠叨執爵著籍繆通
閨異寵何由報孤忠誓不睽裁詩獨慚晚
猶得並鳧鷖

送顏廷藻歸三衢

歲事今如此公歸意若何倚門親望切傳
舍客愁多美議當圓石仙游看爛柯一科
須俯拾五字要長哦

送郭遐齡

喬年

去從公府辟不爲故人留國士真如此臺
家合見收聲名早多誤功業晚方優不必
毛錐子相期定遠侯

次家君韻

栢禪工立雪松壽不凋寒筆底波瀾壯
中宇宙寬登車慵攬轡投檄願休官四海
英名滿懸知袖手難

又

憶昔金門直通班玉殿寒風雲黃道近日
月太虛寬法錦羅千仗宮花覆百官江湖

歲將晚未覺報君難

題玄英先生廟 方干

木老參天直江清白日閑先生元不死遺
廟亦空山文采雲仍似風流正始間平生
子巖子高處得追攀

謹和老人貽具圓復之什

儒名參墨行詩律傲宗風老去能從我生
來未識公據梧心已死行李歲將窮應見
維摩詰天花結習空

和王景文

陸行忌豺虎水去怯風波世路險猶爾客
中愁更多吾生真漫與天道合如何千古
興亡意臨風一放歌

又

斯文到之子砥柱闕頽波致主規模別傷
時疾疚多大臣讒賈誼逆旅欠常何無路
排闥闔聊當扣角歌

又

王師行六月淮海靜無波元老前籌密諸
軍捷奏多西風向蕭瑟北顧要誰何聞說

收兵後謳吟雜雅歌

即事簡蘇廷藻著

落日邊書急秋風戰鼓多私憂真過計長
筭合如何盡歛清淮戍仍收瀚海波棲遲
一尊酒幽恨滿關河

和韓中父

天入南郊白雲連朔野昏敎臣開盛府殤
虜哭新竟聞道通輶傳何當拜寢園荒寒
歲將晚愁絕更堪言

又

東隣子韓子憂國忘晨昏也作漳濱卧誰
招楚些竟舊勲留幙府新渥到丘園家法
傳來久遲君一盡言

東垣

固城朝送客東垣晚留儂浙近風煙好春
回港汊通北來愁亂轍南去喜踈蓬不是
趨朝市松江學釣翁

過建德

古縣依山住肩輿帶雨來閭閻無地着巖
壑有天開野驛編青竹公庭砌碧苔傳聞

長官好小泊亦佳哉

龜齡侍御以番陽士子之意作五

峯亭且賦詩某敬和

廬山真滿眼秀句憶東坡但遣佳名易懸
知得士多雲霄身已近星象手能摩太守
文章伯風行水自波

過嶽麓見子雲題字偶逢來使因

寄二詩

籍甚韓公子情親我弟兄星沙逢驛使嶽
麓見題名共作三年別相望五日一本作十日

程湘江接淮水寄與濯塵纓

又

故人應問我客裏定何如馬鋪爲行館雞
栖是使車四郊多賊壘五筦欠兵儲此去
無來鴈因人數寄書

送劉子思

送客古城東陰晴一日中舊憐杉桎碧新
喜荔枝紅香火叢祠冷魚鰕小市空明朝
萬里別今夕此尊同

月夜與蔡濟忠曹公會汎舟自水

東歸

一舸駕長風銀河此路通
波光連月白燭影到江紅
五嶺經星外千山颯霧中
不知今夜賞更有幾人同

鹿鳴燕

明庭下溫詔方岳貢羣賢
巢鳳山中客栖一本鸞地上仙
魚龍回夜水鵬鷲在秋天
添種家鄉桂歸途快着鞭

訾洲即事

一雨便清涼風回百草香
雲山米家畫水

竹輞川莊僧賦蠲新帖墻榛斬舊行歸鞍
乘晚霽空翠滿輕裝

罷歸

親老難爲住恩深許放歸北行湘水闊南
望瘴煙微兵衛收門戟征塵上客衣遙知
六七月喜氣滿庭闈

罷歸呈同官

去年秋七月我犯瘴煙來賦少畬田熟徭
歸驛路開上恩均雨露孤迹返蒿萊想像
山中趣參差屐齒苔

又

嶺水常時急，蠻山是處高。
戶輸無翠羽，溪瘴有黃茅。
游子歸鄉國，斯人滯冗曹。
臨分那忍別，風裏鬢蕭騷。

贈江清卿

嶺海適相逢，經年颶霧中。
官閑詩格進，祿薄俸囊空。
子昔南征鶴，吾今北去鴻。
江湖渺何許，聽啖九霄風。

一本作一舸鈞絲風

過靈川寄張仲欽兼贈王令尹

塵沙行半日，煙火是靈川。
縣只三家市，渠

通十斛舡官空無見俸稅重有荒田太息
王郎子棲遲欲四年

滑石

重來滑石鋪為愛碧泉鳴古甃苔花澁虛
簷桂月明喬林通夜氣密竹動秋聲客裏
清涼地悠然一振纓

興安

提封連嶺海風土似江吳仙去山藏乳商
歸斗筭珠劬農多樂歲厲俗有通儒已過
炎關了吾行且緩驅

炎關

驅馬度炎關身經瘴野還稍餘衣帶水已
盡劔鎡山海月隨人遠湘雲似我閑不須
占紫氣遊戲且人間

蒸霞谷爲曹公會賦

見說蒸霞谷連山只種桃補成天五色散
作佛千毫月底羣仙下風前細一本作綵仗高
期君成美實歸獻赤霜袍

登瀛橋爲曹公會賦

從此上瀛洲虹蜺晚未收濟川誰作楫浮

海不乘桴弱水三萬里五城十二樓讀書
羣玉府風袂揖丹丘

丙戌七月望日自南臺遊福嚴書

留山中

乞我一枝筇經行又別峯水流仙界葉風
落化城鍾錫去泉無恙車行石有蹤卻憐
磨衲老曾見兩儒宗

自一方廣南臺王僧萬
致一能詩呂紫微汪

內相昔
嘗指授

和萬老

歸途正遼邈此地更淹留落木千山夜空

江萬里秋聊爲無事飲莫賦畔牢愁明發
催舡鼓風颿過橘洲

再和

吾行聊復爾處處賈胡留天入星沙晚風
連夢澤秋未容詩作崇政要酒澆愁明月
無人伴携君鸚鵡洲

于湖居士文集卷第八

三

卷八

九

文

開化圖書館

Warhwa Library

于湖居士文集卷第九

律詩

三塔寺阻雨

塔上一鈴語湖頭三日風蒼山在煙外高
浪與天通市迥新芻少僧殘像教空不妨
留滯好且看夕陽紅

又

倦客三杯酒高僧一味茶涼風撼楊柳晴
日麗荷花鐸語時鳴塔漁歌晚釣槎停艫
快清憩步穩襯明霞

過湘中得詩僧萬致一於書無所
不讀非苟得詩名於僧中者余欲
與俱還吳中而萬家浯溪將結草
庵其上送余至湘陰復歸作四十

字以別

別去太匆匆回舡夢澤東擬尋行脚路忽
遇打頭風梵網威儀在天花結習空它年
三百首吾爲子流通

欽夫子明定叟夜話舟中欽夫說
論語數解天地之心聖人之心盡

在是矣明日賦詩以別

江北我歸去湘西君卜居誰知對牀語勝
讀十年書不飲清無寐來朋樂有餘明朝
千里別密處幾曾踈

送張立之赴臨江判官

珍重清江椽相從五見秋炎涼無改節夷
險有忠謀蓮幙開新府蒲帆漾小舟凄然
洞庭野別意與川流一作波流

黃陵廟

百世黃陵廟淒涼屋數間只憐斑楚竹那

記緒湘山訪古韓碑在徵歌屈些三閑虞嬪
更堯女莫入一作水仙班

磊石

鼓發營田市帆收磊石山冰統六十里煙
髻兩三鬟天氣水雲合人家罾網間晚來
風更熟別浦棹歌還

黃州

平生聞赤壁今日到黃州古戍參差月空
江浩蕩秋艱難念時事留滯豈身謀索索
悲風裏滄浪亦白頭

東坡

繫舡着西日曳杖過一作到東坡暗井蛙成部荒
祠烏作窠老仙騎鶴去穉子飯牛歌興廢
何須問斯文自不磨

過蘄口六奉寺丞仲文親帖之貺
今早本約來陳店復勤千騎至冶
塘所以招迎之意甚厚感歎不已
賦此為謝

故人經歲別連日幾封書不識江頭路仍
迂長者車追參空幕府牽挽到賓除太息

交情薄多公不我踈

臨發再和

水落魚成塞風高鴈欲書公爲東道主我
滯北轅車邊障無傳警朝廷有拜除江干
便迎候此別未云踈

送仲子第用同之韻

淒然鴻鴈影晚歲索衣裘惜別湘江夜歸
程楚甸秋極知違定省不敢更淹留明月
分攜處無言只是愁

送謝夢得歸昭武

送謝夢安得歸昭武
莫吟青玉案恐弊黑貂裘國步艱難日人
間浩蕩秋不須烏工往且作賈胡留後夜
回春閣淒然一段愁

和欽夫喜雨

佛刹起香雲高低一雨均使君心未已閣
老句還新喜入村鄉樂涼生甕瓦盎春莫嫌
知稼穡我是種田人

詩送荊州進士入都

人才收楚產賓薦謹周官就日三吳近披
風七澤寬解包珍貢入琢玉寶光寒簇仗

春旗裏看君策治安

城西晚步呈王亮采

城西行半日佳客偶相隨
古寺尋脩竹荒園讀斷碑
三杯午時酒一簇晚沙旗
春色從今好重來未可知

壓雲亭

登臨多好處第一壓雲亭
水作高低白山分遠近
青人家半煙樹客柁蒲
春汀賸欲留連晚歸時
更摘星

玉淵亭

夜投寶覺寺徑上玉淵亭峽束千崖水天
分一段星神光行熠燿空翠直聳青冥雄觀
兼幽趣悠然寄獨醒

簡寂觀

瀑水流紅葉荒祠瑣翠微紫霄人不到白
鶴事全非苦笋今年少黃冠竟日飢摩澤
石龍柱竚立為戲歛

皇甫坦所居

石側疑無路峯回別有天神泉通玉海帝
畫麗奎躔紫闥雖重到青瑤卻未鑄直須

香案吏爲寫白雲篇

出郊

楚霧侵衣潤湘江到眼明春連嶽麓寺花
滿定王城佳客真如此天公却不晴空濛
殊可意沙濕馬蹄輕

酬朱元晦登定王臺之作

海內朱公子端能爲我來譚諧渺今古權
喜到輿臺日月何曾蔽風雲會有開登臨
一盃酒莫作楚囚哀

吳伯承生孫交游共爲之喜凡七

吳伯承生孫六交游共爲之喜凡七
人分韻我亦從來識英物試教啼
看定何如某得啼定字

得孫當贊喜喚客便分題樓鼓方行夜天
星恰照奎熊罷通夢寐孔釋自提携湯餅
那應晚吾來爲止啼

又

吳郎薄軒冕市隱室垂磬兒孫忽成行乘
除乃天定我女才三歲此事當退聽賸欲
便款門積雨道苦寧

贈王茂升

薦士移書早論文識面遲寬行十里路細
讀百篇詩句法能如此曾中定自竒不嫌
知己少莫厭此官卑

秋日郊居

秋日郊扉樂心閑景趣閑風生疎竹裏雨
在片雲間疏港聊通水關門不礙山殘書
讀未盡飛鳥暮雲還

中秋書事

江月清光冷波亭夜色竒流螢翻露草倦
鵲遶風枝素魄不長滿故人頻語離有懷

千里恨若爲一杯辭

請說歸休好

請說歸休好扶行白髮親訪醫無遠近買
藥辨新陳索酒兼鄰壑要賓盡里人短長
無不可且得是閑身

又

請說歸休好從今自在閑新除墨黃紙舊
隱接青山竹遶披風榭蘆藏釣月灣田間
四時景何處不開顏

喜歸作

月地參差影風簷取次花酒爲春主掌貧
是老生涯湖海扁舟去江淮到處家扶持
兩仙伯丹鼎絢彤霞

故年家姚公挽章

世德方隆報君恩未及封起家惟子好弗
壽竟誰鍾無復時中聖遙憐不相春隻雞
吾阻往投淚睇喬松

于湖居士文集卷第九

于湖居士文集卷第十

絕句

殿廬偶成

簾幙垂垂燕子風
宮花春盡翠陰濃
日長禁直文書靜
寶篆熱時時一拆封

和劉國正覓雌黃

劉郎家具少於車
只有詩囊未厭渠
乞與丹鉛將底用
點勘腹中行秘書

又

蠶牋歌斜落傑句
清似秋月橫蛾眉
口中

雌黃蓋天下聊欲教我煩新詩

蠟梅

滿面宮粧淡淡黃絳紗封蠟貯幽香遙憐
未識春消息乞與一枝教斷腸

次韻左舉善木樨

想見秋花插滿頭遙憐不負此山遊一枝
併與詩筒饋氣壓西湖萬斛秋

以茶芽焦坑送周德友德友來索
賜茶僕無之也

帝家好賜喬雲龍祇到調元六七公賴有

家山供小草猶堪詩老薦春風

又

仇池詩中識焦坑風味官焙可抗行鑽餘
權倖亦及我十輩走前公試烹

蘄春道中

霜淨波平水落灣我行正在畫圖間簾鈎
不用怕風日且看江南江北山

次江州王知府叔堅韻

說河不救癡兒渴砥柱乃障頽波流庾公
樓中三昧手何時歸侍殿西頭

又

霜餘江北山如畫
歲晚家鄉稻作京
萬里公方黃鶴舉
扁舟我自白鷗盟

又

今朝放纜好天色
過午忽作打頭風
却望江州纔十里
我船且繫蘆花中

又

廬山突兀上霄漢
使君豪氣與相醅
廬山雖好不足戀
歸矣當爲蒼生謀

又

連城鼠璞不足唾千金敝帚誰能疇只今
機會不容髮願借前箸君當謀

又

谷簾釀酒極清美風味大似主人翁我有
一尊正傾寫却思煙雨庾樓中

又

何人列屋閉嬋娟憶對清歌重慨然一笑
相憐窮相眼謾撩詩思入愁邊

又

經行有恨是陰雨不見香爐生紫煙安得

草堂容一榻聽松聽水日高眠

道間見梅

寒女生來不解粧天然玉色照孤芳疎籬
茅舍無端恨故有幽人與斷腸

題定山寺

蹇驢夜入定山寺古屋貯月松風清止聞
掛塔一鈴語不見撞鐘千指迎

又

千山蒼茫月東出萬木擺搖風怒號幽人
隱几撫羣動清燈明滅爐煙高

昭亭食柑

一雙分我洞庭秋梨棗傍觀不那羞喚得
風霜回齒頰夜尋清夢五湖舟

和如庵

厭聽諸方三昧禪却思夜雨對床眠欲知
千偈如翻水看取朝來綠漲川

又

不談世法不談禪徹曉勦勦一覺眠箇裏
神通元不小回風急雨震山川

又

朝供爐香夜供燈
閑來落得困曹騰
如庵許我參堂去
長作昭亭粥飯僧

又

一燈分作百千燈
光徧河沙正鬱騰
稽首應庵休揀擇
直須傳與在家僧

又

道人受偈自然燈
筆底光芒夜夜騰
詩成十手不供寫
鑿齒敢對彌天僧

又

飛蛾撲撲誤占燈
火色何人要上騰
我已

澹然忘世味蒲團紙帳只依僧

楓橋

四年忽忽兩經過古岸依然窳塔波借我
繩牀消午暑亂蟬鳴處竹陰多

題西湖可賦軒

風光獵獵上烏巾不那西湖爛熳春借我
繩牀對脩竹爲君一洗軟紅塵

題胡敦約山行圖

松行石磴兩崎嶇此去長安路更迂底箇
官儂強健在葛巾芒屨自騎驢

從張唐卿乞韭黃

雪壓畦蔬僮手斲度郎多日欠常珍懸知
旅食初無恙窖裏黃芽借得春

送紙衾韓中父

韓郎香盡諸緣絕壞衲篝燈供佛熏乞與
紙衾綿樣暖撩教醉裏夢紛紜

又

了知夢境皆虛妄妄念常從夢處開敗子
道心因此夢夢成還我紙衾來

再用韻

雪中紙衾有竒趣煖香夜作椒蘭熏毗耶
丈室本無病天女爲散花紛紜

又

雪花如席風色惡擁被圍爐門不開我亦
窮閭車馬絕一杯相屬望君來

將至宣城和壁間韻寄王宣子

一笑歸來見在身倒傾江水洗緇塵騎驢
緩緩東風裏知有工夫展故人

寄當塗王守叔堅

隔江燈火夜深明見說江城犬不驚黠虜

頭顱當獻社使君曾次有長城

隱靜覓杉株

舊聞隱靜庭前栢虎嘯龍吟三十秋我亦
經營一丘壑無根樹子却須求

題夏氏莊

平湖漠漠雨霏霏壓水人家燕子飛欲向
湖東問春色杏花無數點征衣

舟中即事

夜行水澁舟難進月白林稀鳥易驚老去
不堪霜露力尊中微覺似多情

小憇孫氏竹軒觀諸公詩

開軒種竹仍留客想見此翁強健時借我
繩牀小盤薄爲君試讀壁間詩

又

種竹主人今白髮題詩客子半青雲北來
南去何時了風月依然只此君

王龜齡遣妓送酒賜詩走筆爲謝
不復襄王夢裏雲紛紛縞袂與青裙鳴鞭
枉送齋中釀病徹杯觴欠薄醺

與薦福

湖上童童百畝陰丹樓碧閣照清深不嫌
歌板相喧聒要見桃花印此心

豐城觀音院有胡明仲范伯達汪

彥章諸公題字

中興人物數諸公遺墨淒一本依然野寺中

欲訪英靈無處所獨搔蓬鬢立西風

入桂林歇滑石驛題碧玉泉

百折崎嶇嶺路頭一環清駛石間流須君
淨洗南來眼此去山川勝北州

明年重過次韻六言

世事風經兩過此身遇坎乘流折腰不為
五斗轍環或徧九州

和都運判院韻輒記即事

登臨不但為山水玉節政爾觀民風因君
引我看勝處詩在千山煙雨中

又

平生烟霞成痼疾置在朝市殊不宜夢尋
歸路向何許淮南小山生桂枝

又

先生名字帝所識三節在道已相望早晚

鳴珂朝玉闕朱衣正在殿中央

又

便建油幢上木天棠陰元不用蒲鞭南州
小試調元手國步多難政要賢

又

綠箬青笠舟一葉黃麻紫誥言如綸君扶
日月行黃道我向江湖作散人

又

盆池雖小亦清深要看澄泓印此心不嫌
蛙黽相喧聒夜靜恐有蛟龍吟

又

君詩我續貂不足曹鄴大楚非匹儔要知
二人唱必和異日盛事傳中州

敬謝經略秘閣餘甘湯

甘言誤我三折臂良藥為洗五斗腸欲知
苦過味方永請試君家肘後方

又

此老才堪上諫坡南州留滯意如何還將
苦口劑英主鑿國懸知藥籠多

德慶范監州以子石硯寵假雖小

而奇戲作

曾侍虛皇玉案前
夜書蠶紙筆如椽
莫嫌此石規模小
一寸玄雲萬斛泉

又

端溪別駕極風流
白璧明珠不暗投
笑我支牀已多許
須君隱几更冥搜

以水仙花供都運判院

十月西湖冰齒涼
梅間松下小齋房
幽芳靚色天爲笑
落莫南來也自香

又

瘴土風烟那有此却疑姑射是前身冰肌
玉骨誰消得付與霜臺衣繡人

再和

雪屋因君發妙思作歌可比漢芝房根塵
已證清淨慧鼻觀仍薰知見香

又

玉壺寒露映真色霧閣雲窻立半身可但
凌波學仙子絕於空谷有佳人

和仲欽題粉巖

一麾靡索我欠追從悵望千山紫翠重忽向

郵筒得新句知君正在碧蓮峯

仲欽寄民爲重齋詩和荅

齋中寒日影瓏葱齋外參天十八公二十
四州民樂否莫教一物怨途窮

又

玉節南來兩使星埋輪折檻有家聲不嫌
齋榜民爲重去國當時一葉輕

又

德意丁寧到綠林都捐刀劍作齋民皇華
入奏天顏喜趁得朝元第四春

又

行邊使者幾時回
寄我清風欲滿懷
已把十詩鐫樂石
為公滿意落新齋

又

蠻烟瘴雨侵行李
每向南雲有所思
定自為民忘涉險
請君細讀寄來詩

贈珪老求竹

東窓便種千年竹
準擬清風六月涼
傳語報恩珪長老
相煩去作竹街坊

于湖居士文集卷第十

關化園書館
Kathua Library

于湖居士文集卷第十一

絕句

偶得四月菊以奉提刑運使

午陰籬落小裴回
底許清香鼻觀來
定自霜臺風力峻
故教霜菊暑中開

又

金縷裁衣玉綴裳
掃除瘴暑作秋香
一杯擬做重陽賞
更借西風一夜涼

偶得新茶獻提刑文既壽北堂太
夫人亦可助齊眉之餉也

龍焙新春出尚方細官佳句揔堪嘗遙知
舉按齊眉處再拜萱堂壽未央

鄭義寧送蓴菜

我夢扁舟震澤風蓴羹到筯晚盤空那知
嶺海炎蒸地也有青絲滿碧籠

贈甘法曹

北嶽仙人汗漫遊斯文曾到海邊州誰憐
詩禮甘公子牢落青衫向白頭

贈劉全州子龜從兄弟

山到湘中青未了月橫嶺北夜何其問字

劉郎能載酒為渠更賦一篇詩

和蔡濟忠溪上

一潭秋水不見底十里暮山無斷頭長恨
公餘過溪晚放教明月上扁舟

廣右無筆劉子思携一束來擇其
尤者作字但如此它日中州有筆
當愛惜也

劉侯贈我筆一束筆鋒如錐管如玉不嫌
夜艾剪銀燭為君一掃千兔禿

登七星山呈仲欽

魁杓歷歷控雲嵐地闊天虛萬象涵不與
天公管喉舌猶堪嶽立鎮湘南

又

便驅匹馬出煙嵐聖主恩深若海涵却到
璣衡高處望白雲無數滿江南

壽老迂使者以齋素不置錢

火雲飛電遠連天太息齋厨几不羶定自
隨車有甘雨爲言星使早加鞭

又

藩府東行近繡衣海雲山月照旌麾錦囊

賸有新詩句寄與幽人莫遣遲

臨桂令以薦當趨朝置酒召客戲
作二十八字遣六從事佐之壽其

太夫人

雙鳧舊作朝天計一鷄新收薦士書不惜
持杯相煖熱白頭慈母最憐渠

風洞

山入烏巒連越雋天開斗野對珠宮應憐
嶺海長炎熱乞與清涼萬竅風

羅江驛

湘南湘北三十里六月七月再經過紫荊
花開白酒賤奈此湘中風月一本作何

秦城

塹山堙谷北防胡南築堅城更遠圖桂海
冰天塵不動那知壠上兩耕夫

龜潭

浯溪見渠文字古龜潭有此竹石幽王孫
賣藥城市去江雨過時余獨遊

早發衡山

飛廉盛怒土囊口美滿風帆真快哉後日

南山山下過更留餘力掃塵埃

西湖

岸草汀花對夕陽滿船新月夜鳴榔秋清
菡萏紅千柄風靜瑠璃碧一方

舟中

扁舟東去幾時還身寄雲濤泱泱間一夜
櫓聲鳴到曉覺來蒲眼是它山

又

山圍平遠水浮天目送歸鴻落照邊好趁
新年釀雲液歸來猶及牡丹前

又

亂山深掩小蹊斜野水微茫浸斷霞一笛
晚風生碧樹始知林裏有人家

又

南來北去祗紛紛又過荆山一月春笑殺
風前桃李樹飄蓬猶作未歸人

又

泊船江口夜深深月傍蓬窗照淺斟隔岸
漁燈半明滅不眠空有故人心

喜雨

已晴復雨雨還晴慣閱人間夢不驚小立
欄干搔短髮亂雲飛度夕陽城

謝黃主管

一杯爲我貫天刑便覺人間有獨醒憶昨
金華侍經席曾分甘露飲春庭

有懷

故人春夢誰復見故園梨花二月天丁祝
主人時醉賞荊州寒食又經年

廣右道中

參天古木綠陰合峻極層巒瀑布長啼鳥

一聲家萬里依然無語對斜陽

又

觸鼻野花香泛泛勸歸啼鳥意諄諄嶺南
三月已煩暑猶向江頭細問津

贈鹿苑信公詩禪

詩卷隨身四十年忙時參得竹簞禪而今
投老湘西寺卧看湘江水拍天

又

句中有眼悟方知悟處還同病著錐一箇
機關無兩用鳥窠拈起布毛吹

聞德遠與曾裘甫黎師侯會飲范

周士所

海棠開後碧桃開寒食人家燕子來一病
閉門三十日更無屐齒到蒼苔

又

張飲名園樂有餘奉常何苦但齋居一杯
我亦垂涎甚病起無聊只羨渠

又

臞曾句法早知名新築詩壇五字城不要
綈袍憐范叔應將石鼎調彌明

水仙

淨色只應撩處士國香今不落民家江城
望斷春消息故遣詩人詠此花

賦衡山張氏米帖

人物千年海嶽翁筆精墨妙與天通傳聞
有帖藏張姓怪底湘江月貫虹

借魏元理畫

復古殿中留醉墨只今神品世間無衡山
尚畫傳家寶花鴨來禽肯借不

欽夫折贈海桐賦詩定叟晦夫皆

和某敬報况

童童翠蓋擁天香
窮巷無人亦自芳
能致詩豪四公子
不教辜負好風光

贈周義山子季隱

廼翁幾年在黃閣
郎君四十猶白丁
一家榮瘁不足道
誰持此意聞天庭

樞密端明先生寵分新茶將以麗
句穆然清風久矣不作感歎之餘
輒敢屬和

伐山萬鼓震春雷
春鄉家山挽得回
定自

君王思苦口便同金鼎薦鹽梅

又

先生筆勢挾風雷春色先從筆底回卻笑

龕官成漫與望林止渴竟無梅茶為郵卒所竊但詩

耳筒至

又

詩腸隱隱轉飢雷一本作殷殷作驚雷春困無人與

喚回強續新詩終不似空傳衣鉢向黃梅

送慈曼如金山迎印老住大瀉

傳語金山山下龍乞將上水一帆風道人

自有飛空錫只載中泠十丈洪

小山書院為劉之翰作

萬里清江占一灣叢生桂樹點幽閑誰人
得似劉郎子賦到淮南大小山

舟中熱甚從鄂守李壽翁乞冰雪

櫻桃

熟顆櫻桃種一本作沙和露摘新冰削玉辟風

開南樓縱作一水隔不遣小舟衝浪來

夜半走筆酬壽翁

短蓬掀舞不得寐忽枉新詩手自開主人

留客不作意更送一江風雨來

又

二年塵土堆中坐一到南樓眼暫開風靜
江平留不得待教黃鵠送詩來

琵琶亭

江州司馬舊知音流落江湖感更深萬里
故人明月夜琵琶不作亦沾襟

又

潯陽江上琵琶月彭澤門前楊柳風兩賢
抵許不相似哀樂雖殊吾意同

過三塔寺

湖光瀲灩接天浮
風捲銀濤未肯休
夜岸繫舟來古塔
不妨蹤迹更遲留

又

層巒疊嶂幾重重
萬頃煙波浩渺中
釣艇未歸饒夕照
耳邊蘆葦戰寒風

于湖居士文集卷第十一

開化圖書館

Kathua library

開化圖書館

Kaishua library

開化圖書館


Kaishua library

開化圖書館

Kaishwa library

開化圖書館

Kaifu Library




于湖居士文集

開化圖書館
Kashima Library

三

開化圖書

Kaishwa Library



TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color